

李文忠公奏稿

李文忠公奏稿

卷之一目錄

初到上海覆陳防剿事宜摺

同治元年四月十八日

查明克復青浦情形摺

同治元年四月十八日

奏保郭嵩燾片

同治元年四月十八日

洋將克復甯波片

同治元年四月十八日

西兵會剿南橋法國提督陣亡摺

同治元年四月二十一日

奏報近日軍情摺

同治元年四月二十九日

攻克南橋柘林奉賢各城並踏平杭頭新場賊營摺

同治元年四月

二十九日

招撫南匯城賊並克復川沙廳摺

同治元年五月初九日

西兵退出嘉定摺

同治元年五月初九日

奏調馮桂芬等片

同治元年五月初九日

松郡解圍摺

同治元年五月二十七日

權衡滬鎮緩急片

同治元年五月二十七日

代徵長江洋稅急難籌解摺

同治元年五月二十七日

進勦浦東獲勝摺

同治元年六月十三日

上海西兵情形片

同治元年六月十三日

上海一口豆石請仍歸華商裝運片

同治元年六月十三日

克復金山衛摺

同治元年六月二十五日

察看泖澱各湖水路情形片

同治元年六月二十五日

奏調劉秉璋片

同治元年六月二十五日

進攻青浦並扼守金山衛摺

同治元年七月十三日

覆奏通靖等處江港請飭嚴防摺

同治元年七月十三日

釐定鎮江水陸餉章片

同治元年七月十三日

江海關洋稅第六結並免單稅無從撥還摺

同治元年七月十三日

查明江海關代徵長江稅內並無洋貨進口稅片

同治元年七月十三日

克復青浦縣城摺

同治元年七月十八日

李文忠公奏稿卷一

全集一之一

桐城吳汝綸編錄

初到上海覆陳防剿事宜摺

同治元年四月十八日

奏爲欽奉聖次

諭旨恭摺陳仰祈

聖鑒事竊同治元年四月十二日准通商大臣薛煥咨開承准議

政王軍機大臣字寄三月二十七日奉

上諭本日已明降諭旨令李鴻章署理江蘇巡撫松滬兵勇眾多而紀律不明於剿匪未能得力卽著將各兵勇詳加簡閱汰去老弱挑選精銳遴派得力將弁管帶以資防剿李鴻章務當體察洋人之性設法籠絡上海洋鎗隊頗資得力外國人時常誇耀其力該署撫不妨多爲教演以鼓舞洋人至華爾等名利兼圖亦當遇

事半龍毋惜小費鎮江一城爲大江南北關鍵地屬緊要前據曾國藩奏稱該處係進兵形勝之區擬令該署撫帶兵前往駐紮爲規復各城之計現在揚防萬分喫緊都興阿之軍不敷分布如該署撫能紮鎮城則大江南北均資聯絡該署撫既膺疆寄蘇省之地均所管轄如將上海事宜布置稍定可以分身赴鎮其赴滬各營應留上海若干之處均著酌量辦理再據毛鴻賓奏臬司陳士杰請在籍養親已明降諭旨准其開缺江蘇按察使以劉卹膏署理矣劉卹膏深得民心經中外保奏並著曾國藩李鴻章察看如該員於軍務可期得力則李鴻章往鎮江後所有上海軍務即可責成該員接辦儻該員不能駕馭楚軍卽著該署撫另簡得力之員管帶並將上海附近失陷各城會同洋人相機進兵節節攻復以顧餉源並爲將來夾攻之計等因欽此又承准議政王軍機

大臣字寄三月二十八日奉

上諭昨據何國藩奏李鴻章到滬布置粗定仍親赴鎮江察看情形分兵防守所統水師卽由梁山賊營衝過以達於鎮已諭令都興阿分飭各路將弁嚴密駐守一俟李鴻章回鎮後卽飭各軍會同勦洗李鴻章身膺鼎寄大江南北均歸統轄務當與都興阿和衷共濟以期水陸夾攻將竄踞揚屬逆氛剋期掃蕩方爲不負委任等因欽此又四月十三日准薛煥咨開承准議政王軍機大臣字寄四月初二日奉

上諭據吳棠奏髮逆竄撲揚城都興阿兵勇未滿兩萬賊眾兵單情形萬緊現在逆匪蔓延至揚城北路司徒廟等處請飭水陸兵分道接應等語李鴻章所部兵勇前據曾國藩奏稱分三起下駛業經諭令該署撫將上海事宜布置稍定帶兵駐紮鎮江俾都興

阿得資聯絡現在揚防喫緊恐難曠日待援著李鴻章卽令後起赴防兵勇於行抵瓜儀時先其所急會合都興阿之軍迅將撲揚逆匪奮力勦擊毋誤事機儻李鴻章能先赴鎮江一帶相機應援尤屬妥善等因欽此仰蒙

聖訓周詳力籌兼顧伏讀之下感悚莫名臣於三月初八日帶陸勇二千人搭輪舟由皖啟行初十日抵滬續到兵勇至四月初四日止其計五千五百人俱紮營上海城南現尙有楚勇兩營未至總兵黃翼升所帶淮揚水師四千餘人協勦東西梁山一帶尙無下駛準期屢接督臣何國藩來函以兵勇訓練未熟人數未齊目下斷不宜出仗臣親駐營盤督率操演未敢少懈近來洋人助勦連復嘉定青浦二城英國水師提督何伯強次與臣會商諄催派兵會勦浦東之川沙南匯奉賢金山等廳縣急不可待臣之兵力



何足以云會剿惟外國兵將爲我出力豈可重拂其意臣於十五日接受撫篆卽派所部四千人進紮南匯縣之周浦鎮由北路相機攻剿英法各兵自松江進金山衛由南路相機攻剿兩路分進相距百數十里既可掣賊匪之勢亦不至絕洋人之歡如浦東廳縣乘勢肅清當屯重兵於金山衛以堵浙江全省踞城東竄之路此臣謹遵

諭旨體察洋人之性設法籠絡之微意也松滬水陸各軍人數雖眾紀律不明久邀

聖明洞鑒若遂加挑汰擇換將領束以楚軍規制訓練整頓必須數月乃有眉目署臬司劉邵檉樸實廉正深得民心現委辦臣軍營務藉資練習亦須數月後察看能否接辦臣從曾國藩討論軍事數年見其選將練兵艱苦經營不期旦夕之速效到滬後兩晤

英提督何伯謂外國募兵之法須操練六箇月乃使出仗其戰勝  
攻取固由鎗礮之精亦由紀律之嚴江南大營平素絕不操練故  
兵勇習氣最深收拾頗難鎮滬各防皆沿此弊臣在上海恐未卽  
有化弱爲強之效臣往鎮江亦未必無一傳眾咻之虞但臣職分  
所在不敢畏難當避

旨詳加簡閱悉心選汰如能將上海水陸各軍兩三月間整理就  
緒付託有人然後周歷北岸以達於鎮可無內顧之憂容臣隨時  
察度奏明辦理此臣籌畫兵事次第布置之大略也鎮江爲南北  
關鍵自古用兵必爭之地今日進兵形勝之區臣亟思移駐彼間  
與上游諸軍及都興阿之師就近聯絡況揚防喫緊屢奉

諭旨飭援復何敢稍存推諉惟臣既在上海甫經接任一切尙未  
措手固未容舍之他去其後起未到者僅有兩營新募之勇實不

足自當一路洋船又不肯中道停泊勢難令其於行抵瓜儀時上岸援剿頃據喬松年稟報都興阿督軍嚴守賊已向西北撤退如果鎮揚再警俟臣處水師下駛酌留數營於裏下河各口以固江防若臣移駐鎮江則當會同都興阿互相援應合力掃蕩臣才力庸弱本不敢居統轄南北之名兵數單寡暫無以備分援各路之用伏乞

皇上鑒臣愚悃期以歲時俾練成勁旅或上游另有續撥之師庶近防遠剿稍有可恃此臣目前力量不能赴救揚州之實情也所有疊奉

諭旨據實覆陳緣由恭摺由六百里具陳伏乞

皇上聖鑒訓示謹

奏

查明克復青浦情形摺

同治元年四月十八日

奏爲查明克復青浦縣城詳細情形恭摺奏祈

聖鑒事竊本月十四日官軍會同英法國兵攻克青浦縣城當經

前撫

臣薛煥

將大略情形馳報並聲明飭令吳煦楊坊李恆嵩等

詳細具稟

由臣

覈奏在案茲據該署司等同時稟報自初三日克

復嘉定後約會副將銜華爾商同英國提督何伯法國提督卜羅

德挑備勁旅規復青浦十一日何伯卜羅德等帶兵二千餘名華

爾帶常勝軍一千六百餘名直抵該縣距城里許十二三日密探

賊勢定策進攻十四日寅刻英國將士環攻南西二門常勝軍徑

攻東門參將李恆嵩林叢文郭太平已革參將姚紹修已革道員

馮席珍遊擊劉士奇等督飭各隊青浦縣知縣廖秩璋帶領團勇

會攻北門其小西門水道經已革提督曾秉忠派令遊擊曾敏行

曾繼榮等帶礮船堵截時城內賊匪憑高負固以鎗礮抗拒我軍奮勇環擊復經英法兵施放炸彈火龍並以大礮轟坍西南城牆十餘丈卽由西門首先登城華爾督勇繼進羣賊忙亂我軍一擁而上殺賊甚多餘逆奪門衝出中外兵勇痛加截殺該逆進退無路投水死者不計其數復陣斬悍賊千餘名生擒三千餘名救出被擄男婦三千餘人當將青浦縣城克復其附近數十里賊蹤悉爲官兵掃除淨盡現暫派常勝軍會同英法所派西兵在城駐守李恆嵩派兵在趙屯港兩岸紮營以堵蘇州援賊各等情詳細具報前來臣查青浦被賊竄踞兩年以來屢由此撲犯淞滬巢穴甚堅此次英法提督何伯卜羅德會合官軍攻剿用其利器立時克復其誠惻甚屬可嘉應懇

聖恩特頒

天語褒獎以致其感悅之忱副將銜華爾屢著戰功擬請以副將補用其餘在事協勦員弁兵勇亦有微勞可否擇尤彙案請獎青浦縣知縣廖秩璋上年失守城池本有應得之罪此次帶團會勦調和中外弁兵隨同收復可否

加恩免其治罪仍帶革職處分留於本城效力之處出自

皇上逾格鴻施所有克復青浦縣詳細情形謹繕摺由驛馳陳伏

乞

聖鑒訓示謹

奏

奏保郭嵩燾片

同治元年四月十八日

再蘇省吏治彫敝監司大員必須有文武幹濟之才廉正敦慤之  
品爲之表率庶可漸挽頽風查湖南在籍翰林院編修郭嵩燾學  
識閎通志行堅卓咸豐三年帶勇救江忠源於南昌四年以後往  
來門國藩軍中九年春開復經曾國藩奏調時已入直

南書房旋往傅格林沁天津軍營襄辦防務十年因病假歸前湖  
北撫臣胡林翼屢招未至安徽撫臣李續宜兩次奏調亦未赴營  
自以近臣乞退去就禁嚴若假以尺寸之柄俾資展布當亦不甘  
廢棄臣一介疏庸蒙

皇上天恩超擢至此夙夜愧悚惟思求賢自輔以收切磋之益可  
否仰荷

特旨將郭嵩燾擢授江蘇司道實缺於察吏整軍籌餉輯夷各事

均能有所裨助且與上下游楚軍亦易聯絡臣前在安慶曾與督臣曾國藩商及茲因蘇松糧道出缺附便密陳伏乞皇上聖鑒采擇訓示施行謹附片具奏



洋將克復甯波片

同治元年四月十八日

再據浙江甯波人江蘇候補知府樓一枝稟稱已革甯紹台道張景渠署甯波府知府林鈞由定海率領廣艇鄉勇進攻於四月初八日攻復鎮海縣城十二日進攻甯波逆匪堅拒不退開礮抵禦中傷外國根撥子船頭洋人二名外國兵船同開大礮轟入城內遂用梯登城殺人賊始逃竄慈谿等情前來適英國水師提督何伯來臣營面稱甯波實於十二日經該國兵船克復商請借撥華爾兵勇六百名馳往協同英法兵船防守並請中國趕派官員駐紮籌防洋人願爲幫助等因除由臣諭令署藩司吳煦暫借華爾兵六百名前往協守緘請督臣曾國藩轉商左宗棠酌派文武大員由閩航海赴甯督辦防務經理關稅外伏乞皇上敕下閩浙撫迅速委派並撥水陸官軍駐甯設防以重口

岸而免後患伏乞

聖鑒訓示謹附片具

奏

西兵會勦南橋法國提督陣亡摺

同治元年四月二十一日

奏爲西兵攻克南橋賊壘法國提督受傷陣亡恭摺馳陳仰祈  
聖鑒事竊英法二國誠心助勦先後克復嘉定青浦縣城臣受任  
之初業於四月十八日將會克青浦詳細情形馳報在案茲據署  
藩司吳煦稟稱英提督何伯法提督卜羅德統帶西兵協同副將  
銜華爾管帶常勝軍於十八日進勦浦東距奉賢縣之南橋鎮二  
三里駐紮十九日兩國提督親往察看形勢安排礮位西初擊賊  
於鎮西賊恃三道土城濠溝深闊更番施放礮子密如雨西正  
二刻法提督卜羅德勇往直前撲近城濠揮令西兵及常勝軍冒  
煙衝入該鎮賊眾紛紛驚潰卜羅德正在督戰不意猝被鎗子中  
傷心坎登時昏暈經繙譯官扶行二十餘步倒地而絕時隨營委  
員候補州同葛繩孝一面催令痛擊踏毀賊營一面照料卜羅德

屍身以輪船馳送回滬該署司當即親詣察看該提督確被鎗子穿胸致命其身後各事已屬法領事官妥爲辦理俟收殮時再躬往照料稟請據情具奏前來臣伏查英法二國提督疊次會剿出力前因進攻龍珠庵賊營英提督何伯腿受鎗傷欽奉

諭旨飭令妥爲存問夷情感悅倍加踴躍此次法提督卜羅德進攻賊營中鎗殞命忠勇奮發尤堪敬憫可否仰懇

天語褒嘉並應如何

加恩賞卹以示懷柔之處出自

聖裁除攻克南橋賊壘及我軍分投堵剿情形另摺續奏外所有法國提督陣亡請卹緣由謹會同辦理通商大臣臣薛煥合詞繕摺具陳再此摺本應由驛馳遞緣法國駐京公使參贊哥士奇白請乘輪船之便赴京齎投因敬謹封交並咨請總理衙門恭代遞

進以順夷情合併聲明伏乞  
皇上聖鑒訓示謹  
奏

奏報近日軍情摺

同治元年四月二十九日

奏爲縷陳近日各路軍情恭摺奏祈

聖鑒事竊前撫臣薛煥派攻太倉一軍被大股援賊攻陷寶山嘉定青浦同時告警各緣由經臣於二十一日附片具報在案先是偽忠王李秀成駐守蘇州因嘉定青浦相繼克復逼近蘇城忠逆遂調踞守杭州嘉興之偽聽王陳姓偽納王郅姓聲稱九十餘軍晝夜急馳合股來撲忠逆自統十餘萬人抄撲太倉官軍後路知府李慶琛等方紮營板橋圖攻太倉臣於十五日接任卽批飭該府以兵勇本不得力久頓城下必有他變應相機妥爲撤回乃援賊驟至該府旣不能先幾撤退又不爲半日之守以至所帶五千餘人大半覆沒僅參將姜德帶隊由東路衝出回守寶山二十日逆眾跟蹤連撲寶山營盤姜德倉皇置守勢極危險二十一二三

四等日分路更番猛撲晝夜不休臣飛飭總兵鞠耀乾分派舟師駛入夾擊並調參將梁勝章及已革記名總兵況文榜各帶隊伍馳往援剿並次嚴飭姜德及吳淞營參將劉錫溫扼堵長濠俟賊逼近以鎗礮轟擊不許兵勇出濠一步該將等督隊苦守數日目不交睫困乏已極幸將賊眾擊退吳淞要口得以保全此太倉一軍被陷賊連撲寶山我軍嚴守之實在情形也二十日逆眾分竄婁塘緣互數十里繞撲嘉定縣城副將熊兆周等所帶兵勇會同英法留守之兵分隊巡防自二十三日起賊愈洶湧晝則薨水爬城夜則分門攻打經各軍奮力抵擊賊遂抄至南翔黃渡阻我餉運欲以長圍困我正值諸路緊急官軍無可抽調英提督何伯等自浦東柘林撤回全軍於二十六日馳往援救二十七日進至南翔賊即退去旋又折回附近村鎮與英兵相持洋人又欲將嘉

定守兵調出夾勦或可將此股擊退至青浦城守事宜本係華爾  
獨任參將李恆嵩全隊進扼趙屯港四港口一帶十九日陳逆大  
股分路竄撲李恆嵩失去礮船十餘隻二十日趙屯港添賊十餘  
萬並將蔣胥浦及舊青浦對岸搭造浮橋抄襲後路我軍接仗頗  
有傷亡二十一日李恆嵩商同參將林叢文游擊王玉林退紮北  
崙山該逆卽由重固衝至青浦北門二十四日又分五路來撲北  
崙山李恆嵩等力不能支又退紮塘橋泗涇廣富林各處以固松  
江門戶賊眾連日圍攻青浦甚急華爾由浦東馳回入城堅守松  
江府城亦經該文武預籌防禦其湖河來路並咨請曾秉忠派船  
分扼此嘉定青浦同時被圍中外官軍分投堵勦之實在情形也  
臣之初意如嘉青再警卽將派往浦東之湘淮各勇四千人調回  
援勦乃英國水陸提督領事各官於二十五日邀臣會商謂西路



之賊已調該兩國全軍往援臣部卽應移守南橋以防金山衛各賊回竄並堅欲與臣立定條約臣見洋人與賊爲仇實欲覓好於我其維大局未便重拂其意此次忠逆傾巢而出亦非臣軍單弱所能操必勝之券不若推讓西兵以聯外援而敦永好臣俟青嘉賊退上海根本稍固卽親巡各防督率訓練如西兵援剿青嘉不能得手則滬防必危臣再將浦東數千人調回併力嚴守松江提標中營參將李恆嵩帶水陸六七千經前撫臣薛煥飭扼趙屯港乃疊次退紮毫無堅忍之力應請

旨先行革職留任以觀後效如泗涇塘橋各要隘再有挫失卽請從重治罪參將姜德劉錫溫梁勝章固守寶山屢瀕於危卒能擊退援賊未便沒其微勞可否請

旨均以副將補用吳淞營把總鮑承泰接仗陣亡應請

飭部議卹所有縶陳各路軍情緣由謹繕摺由六百里馳陳伏乞  
皇上聖鑒訓示謹  
奏

攻克南橋柘林奉賢各城並踏平杭頭新場賊營摺

同治元年四月

二十九日

奏為中外官兵攻克南橋鎮柘林奉賢各城又周浦一軍踏平杭頭新場賊營恭摺馳陳仰祈

聖鑒事竊西兵會剿南橋法提督卜羅德被鎗陣亡當經臣於二十一日專摺馳奏交該國參贊爵士奇齋帶入京請由總理衙門恭進在案先是南橋之賊憑恃該鎮為浦東適中之地負隅死守環鎮三里築壘濬濠內設礮臺四座堅固異常四月十八日英提督何伯繙譯官阿查里法提督卜羅德共帶西兵三千餘名副將銜華爾帶常勝軍二千餘名會防局委員候補知縣倪葆仁等督帶礮勇民夫隨同進發十九日礮賊鎮西法提督卜羅德猝被鎗子穿胸陣亡餘眾亦有傷斃西兵憤甚迭用巨礮轟倒西面礮臺

該逆猶於北面礮臺開礮力拒。兵法各兵躍濠而入，爭先奮擊。賊始不支，且戰且走。奉賢縣知縣陳化鯤率團四路追截，殺斃尤眾。賊遂望柘林而遁，計斬首千餘級，生擒賊目數十名，搜獲伏賊二千餘名。二十日，各軍進抵柘林。該處本有城寨，逆眾憑險負固。二十一日，英兵常勝軍及礮勇營於城之西北，法兵營於城之西南。正在試礮，聞金山衛突出逆黨數千來援，沿途放火，直倡我營西兵擊走之。二十二日寅刻，各營開礮轟城。城中之賊以礮還拒。幸西兵礮無虛發，所攻城堞與賊俱碎。旋將西門轟裂，大隊擁入。餘賊東潰，追殺不可勝計。時克復柘林城。二十三日，奉賢縣知縣陳化鯤、青村營都司汪錫等帶領海勇暨各鄉團勇乘勝進攻。奉賢該逆初猶抗拒，繼開北門，由海塘西竄。遂將奉賢縣城收復。臣處派往周浦之湘淮各勇四千，於二十日進抵該鎮，堅紮營壘。

賊先於離周浦十八里之杭頭地方結壘四座迎拒我師二十二日參將程學啟帶隊前往攻擊是夜賊卽潛遁參將滕嗣武都司銜千總劉銘傳通判韓正國等復添隊伍追至新場賊眾整隊回撲鏖戰兩時賊卽紛紛逃竄立將賊卡賊壘平燬淨盡殺斃數百人生擒四十餘人追至南匯城下因天雨收隊此中外官軍進攻浦東連克一鎮兩城並踏燬賊營之實在情形也初西兵議復柘林後直趨金山衛以期一氣掃蕩至是聞太倉失利忠逆糾眾數十萬分撲嘉青寶三縣遂罷金山之攻折回援勦英提督何伯等復與臣面商請臣將周浦一軍調往南橋扼堵浙西浦東各賊回竄之路以便抽調西兵回滬等語臣允其所請昨親赴周浦徧諭將士卽日拔往南橋相機堵擊伏查南橋爲浦東咽喉柘林奉賢兩城皆沿海要地逆匪佔踞半年經我軍會同英法各兵奮勇攻

克其尤爲出力員弁可否容臣查明彙案請獎再英國兵官有巴  
兵白來渣者督帶礮勇積受勞傷於行營暴病身故亦屬歿於王  
事擬仰懇

皇上溫諭褒獎并飭下總理衙門議卹以慰忠魂而敦和好伏候  
聖裁所有攻克南橋鎮柘林奉賢兩城並踏平杭頭新場賊營各  
緣由謹繕摺由驛馳陳伏乞

皇上聖鑒訓示謹  
奏

招撫南匯城賊並克復川沙廳摺

同治元年五月初九日

奏爲官軍乘勝招撫南匯投誠逆首立復縣城續卽合力擊退撲城援賊並克復川沙廳城恭摺馳陳仰祈

聖鑒事竊中外官軍分攻浦東連克一鎮兩城並踏燬杭頭新場城營各緣山業經臣於四月二十九日恭摺奏報在案方臣與英國水師提督何伯會議將駐紮周浦一軍調赴南橋頭起兵勇正在拔隊仍留同知潘鼎新都司銜劉銘傳兩營暫駐周浦以觀南匯城賊動靜藉資控扼詎匯城賊眾怵於杭頭新場之挫人人解體屢求本地團董來營說降並專人投遞稟詞潘鼎新劉銘傳與署南匯縣知縣鄧賢芬悉心計議以該縣城池高深積糧尙多急攻未能遽下賊勢雖眾其膽甚寒若仰體

皇上寬仁之德設法招撫開以生路似可不煩兵力當遣本營長

髮密探入城廉得賊情益賊首僞什天安吳建瀛屢受僞忠二殿  
下凌辱久有他志僞淋天福劉玉林方有才等半係敗兵被脅更  
非甘心從逆三人其統眾萬餘踞守南匯既已勢蹙回心自可因  
機利導臣飭潘鼎新等脅以兵威曉以大義並飛調劉銘傳面  
詢情形諭以不可貪功輕信稍涉大意據該營官稟稱吳建瀛劉  
玉林情詞懇切揆其事勢至此可無疑慮是夜劉銘傳馳回周浦  
五月初一日會同潘鼎新鄧賢芬分帶勇團直抵城下部勒嚴整  
傳諭城內全行薙髮并將各僞印兵器等件儘數呈繳我軍整隊  
入城降眾一萬餘人伏地歡呼跪迎迨至吳建瀛劉玉林方有才  
各願率勇勦賊以圖報效當經各該員推誠撫馭解散被脅難民  
數千其餘各就所部申明紀律分別遣留卽於是日收復南匯縣  
城臣卽劄委劉銘傳署理南匯營都司會同南匯縣知縣鄧賢芬



安籌安插降卒及善後事宜並令將我軍銘鼎兩營移駐杭頭就  
近鈐制吳建瀛劉玉林方有才等酌給軍功頂戴實令勦賊自效  
仍面囑潘鼎新劉銘傳以吳建瀛等甫經投降是否真能殺賊立  
功須隨時察看督令進剿川沙以自贖此初一日招撫南匯降賊  
收復城池之實在情形也偽忠二殿下者係偽忠王李秀成之子  
擁眾數萬盤踞金山衛圖援川南各城聞吳建瀛投降遣人來匯  
密諭煽惑初二日傍晚有賊萬餘由金山竄下初三日辰刻賊目  
偽朝將吉慶元率眾撲城復射進偽示及手書各件吳建瀛劉玉  
林義不返顧隨同鄧賢芬劉銘傳帶勇出擊賊眾望見旗幟卽行  
卻退追十餘里劉玉林方有才接仗多時欲撤不能劉銘傳卽派  
訓導趙宗道軍功劉盛藻縣丞丁壽昌率小鎗隊從旁迎擊賊紛  
紛披靡斬馘十餘級奪獲鎗礮多件賊眾遂竄往川沙初四日川

沙踞賊與援賊合股回撲南匯自北而南蔓延二十餘里劉銘傳督同吳建瀛等登城固守並派趙宗道劉盛藻乘間帶隊出城埋伏夾擊賊不能支漸移南去旋即帶勇進圖川沙及抵城根賊之尾隊盡由海塘竄去沿途截殺不可勝計遂於五月初五日辰刻收復川沙廳城此初二至初五日擊退大股援賊並收復川沙廳之實在情形也臣伏查南匯一城居浦東各縣之腹地握川沙奉賢之臂膂但使此城得手則浦東各廳縣之賊首尾不能相顧自可迎刃而解潘鼎新劉銘傳等紮營南匯境內之周浦屢次截擊獲勝乘其窮蹙擒貳之際招降逆首收復要區並督降眾協力戰守擊退援賊連復川沙深得以毒攻毒之法可謂謀勇兼優擬懇聖恩從優獎勵丁憂候選同知潘鼎新擬請旨俟服闋後免選同知以知府留於江蘇補用都司銜千總劉銘

傳擬請

旨以都司留於江蘇補用並加游擊銜江蘇候補同知直隸州署  
南匯縣知縣鄧賢芬本有失守處分茲帶團助剿并設密謀諭降  
逆首剋期收復督率降眾守城力捍援賊實屬著有勞績可否請  
旨免其查辦其餘在事出力各員并可否由臣查明擇尤請獎至  
降酋吳建瀛等經臣設法駕馭許以虛銜頂戴竟能固守危城豈  
摧狂寇使川沙之賊畏而棄去容臣隨時察酌俟續立功績另行  
奏請

恩施所有官軍乘勝招撫南匯逆首立復縣城續將撲城賊眾擊  
退並收復川沙廳各緣由理合繕摺由六百里馳陳伏乞  
皇上聖鑒訓示謹

奏

西兵退出嘉定摺

同治元年五月初九日

奏爲西兵強挾官軍退出嘉定賊勢復張松滙各防同時喫緊調  
派水陸兵勇分投堵剿情形恭摺馳陳仰祈

聖鑒事竊嘉定克復後旋被忠賊大股圍攻經臣於四月二十九  
日奏報在案先是薛煥所派知府李慶琛規取太倉一軍四月十  
九日覆於板橋於是寶山嘉定青浦各城同時告警寶山擊退而  
嘉定之圍尤急臣所部湘淮勇甫經派赴浦東旣不能倉卒回救  
英法兩國提督方調全軍援嘉意謂可以旦夕得手臣但飛札各  
路在防將弁申明賞罰飭其在城守城在營守營以待援師不准  
出濠一步致有挫失嘉定守城官軍自四月十九至二十八日晝  
夜巡防目不交睫洵亦勞苦萬狀乃英法提督忽於二十八日派  
隊衝入重圍接護西兵及我軍一同出城其時該署縣李克勤以

未奉札諭爲辭副將熊兆周亦不允帶兵出城並懇留洋人協守無如該兵頭等不受商量硬將該文武及留防兵勇挾之以出本係暫退嘉定境內之南翔鎮次日西兵全隊復由南翔撤回上海以致嘉定一城復爲賊據臣正在籌兵接應連接英領事麥華陀兩面內稱現議嘉定所駐之西兵均行撤退應請速將中國兵同卽退出以免誤事該提督已請該邑知縣及帶兵官隨營出城詎伊固執不允事不得已只好用強拉出各等語臣接閱之下不勝駭異五月初一日英法提督領事各官偕至臣營面詰其故則謂嘉定賊眾兵單久被圍困餉運隔絕恐致喫虧是以徑將中外各兵撤回保守上海臣以我國軍法森嚴有進無退守城官兵豈容輕撤該提督等復再四央求謂此皆西兵之咎實與該文武無涉請勿加罪臣卽飭令熊兆周李克勤等退出之兵駐守法華以扼

滬西來路惟嘉城復失逆賊大張西兵爲賊眾所懾從此不肯出  
擊賊遂直趨青浦松江初一日分兩大股一由北簞山鳳凰山牽  
制泗涇之前一由方家窰過龍珠庵七堡繞撲泗涇之後蔓延數  
十里前派駐守泗涇之遊擊林叢文參將姚紹修郭太平已革道  
員馮席珍各營二千五百人首尾不支於初二日申刻全行潰散  
而參將王玉林二千餘人紮守廣富林尤爲松江緊要隘口亦偪  
於賊勢退紮松郡北門該逆遂偪撲松城松江府知府賈益謙與  
提中軍參將李恆嵩商調唐橋之兵移紮城南已革提督曾秉忠  
亦帶水陸各軍由青浦回援副將銜華爾於初一日帶火輪船兩  
隻往解青浦之圍初二日用大礮轟進賊卡不料開至第四礮忽  
然炸裂賊二萬餘蜂擁而來只得暫行收隊旋聞松江緊急初四  
日趕回郡城會商中外各軍布置嚴守適賊眾攻撲東門華爾率

洋鎗小隊轟斃百餘名初五日復將城外民房燒燬使攻城之賊無可伏匿青浦本係華爾常勝軍分守孤懸賊中該逆進圍更急四面重疊築營三十餘座無路進援徒爲焦灼此因西兵退出嘉定而青浦松江兩城危急支持之實在情形也自泗涇營盤失陷賊卽分股斜趨虹橋漕河涇一帶距滬僅二十里臣聞西兵撤退知賊必跟蹤撲滬先於初三日調回商紮南橋之湘淮各勇三千人保守根本初四五日賊氛漸倡漸近因飭參將程學啟滕嗣武通判韓正國各營於初六日四鼓拔隊馳赴虹橋擇要扼紮相機迎擊以分青浦松江後路賊勢並令副將滕嗣林督帶臣老營五成隊分道策應是日黎明程學啟前隊行至漕河涇正遇大股賊眾迎面撲來約四千人搖旗吶喊勢極凶悍程學啟卽指揮迎敵鎗礮齊施賊死拒不退程學啟手放洋鎗擊倒騎馬賊目逆眾

國然欲潰參將張遇春等復由月路催軍趕到前後包擊掩殺六七百人生擒四十餘名賊盡棄器械衣件奪路狂奔追殺四五里因天雨路滑港汊多歧收回虹橋搶築營壘初七日七堡賊營整隊欲進程學啟滕嗣武韓正國各帶隊伍乘勝追勦鏖戰半時賊卽潰走我軍一擁而前立將七堡賊壘四座燒燬淨盡程學啟韓正國等追往小渡船羅家塘一帶沿途賊卡均已勦洗將至泗涇賊大股萬餘回撲我軍排轟鎗礮大呼衝殺又斃賊百餘兵勇受傷十餘人各營齊出大隊飛往接應自辰至午將賊擊退此又湘淮各軍調回上海連日擊賊獲勝踏平七堡賊營之實在情形也臣查松滬各防兵將積習相沿既不能苦戰以挫兇鋒復不肯堅守以遏要隘僅華爾一軍聯絡洋人尙肯出力臣由上游帶來新軍六千餘人分之不能兼顧數城合之或可自當一路昨因南匯



投誠機會難得不得不酌留浦東千人以資控制遂覺愈分愈單  
茲松青日危誠恐大股回撲上海臣軍須由滬城西南進紮一面  
堵截松賊一面策應滬防惟賊勢浩大此閒兵勇節節潰退徒爲  
外人所輕臣心實深憤恨急應分別參辦貴州定廣協副將熊兆  
周署嘉定縣知縣李克勤均有防守專責雖由外國兵頭強拉出  
城與擅自撤退逃避者有閒惟城池被陷究有應得之咎可否請  
旨從寬卽予革職參將姚紹修郭太平游擊林叢文已革道員馮  
席珍派守泗涇堵禦不力參將王玉林扼紮廣富林擅自撤退應  
請

旨將姚紹修郭太平林叢文革職不准留營馮席珍發往軍臺効  
力贖罪王玉林以守備降補以觀後效除將各路軍情續再分別  
據實奏報外所有西兵強挾官軍退出嘉定松滬各防同時喫緊

調派水陸兵勇分投堵剿各緣由理合繕摺縷晰馳陳伏乞  
皇上聖鑒訓示謹  
奏

奏調馮桂芬等片

同治元年五月初九日

再江蘇吏治多趨浮偽巧滑一路自王有齡用事專尚才能不講操守上下朋比風氣益敝流染至今臣於未接任之前即商請督臣曾國藩檄調湖南丁憂起復在籍之江蘇候補知府黃芳來營察看委用旋又附片奏保郭嵩燾並請督臣兩催來蘇原期得人幾事漸挽積習茲欽奉四月二十三日

寄諭滬上稅務釐捐均為劣員侵吞人已著嚴密查辦並著該撫派委廉潔之員妥為經理如上海無可派之員即咨曾國藩調派妥員赴滬差委力除積習以清弊端等因欽此仰蒙

聖明燭照指示周詳下懷曷勝欽感昨又恭錄臧商曾國藩去後查有五品銜候補中允馮桂芬精思卓識講求經濟翰林院編修王凱泰戶部主事錢鼎銘丁憂安徽候補道王大經安徽候補直

隸州知州閻燁同知銜浙江候補知縣薛時雨新選江西建昌縣知縣王學懋皆才明守潔篤實不浮錢鼎銘王大經王學懋三員業調赴臣營差委馮桂芬現寓上海王凱泰現由江北團練銷差回京可否

飭來臣營以資贊助閻燁在安徽辦釐著有成效薛時雨爲浙中循吏羅遵殿曾專疏保薦現聞僑寓江西可否請

旨敕下曾國藩李續宜沈葆楨飭令該員等迅搭輪舟赴滬由臣酌量器使繕除積弊伏乞

聖鑒訓示謹附片具

奏

松郡解圍摺

同治元年五月二十七日

奏爲官軍連獲大捷擊退大股竄賊肅平賊卡賊壘數十座松郡解圍滬防肅清恭摺馳陳仰祈

聖鑒事竊西兵撤出嘉定賊勢蔓延松青兩城危急支持各情形經臣於五月初九日奏報在案十餘日來賊圍松江愈倡愈緊該郡城扼浦東西之中毘接海青頭頭是道一有疏虞則上海亦難孤立臣連日焦思熟慮督令參將程學啟等自虹橋節節進紮牽制松賊並飭署藩司吳煦多運米糧軍火開道送入松城批飭華爾會同松江府知府賈益謙參將李恆嵩堅忍固守伺隙出擊各催已革提督曾秉忠添撥礮船駛剿多張援救以搖賊心嚴懲潰退以堅軍志華爾又將前次撥往甯波協守之兵星夜調回以厚兵力其各路潰勇不下數千則分派將領招集強壯資道疲弱免

致散附郡城圍勦句結臣朝夕激厲本營不時親赴前敵三令五申嚴整部署以重根本而奪賊氣初賊據松江西門外妙嚴寺土山爲營信城最近華爾以大礮轟燬其壘南門外大張涇營盤先爲賊踞我軍併力奪回以通松滬要路初八日再爲賊攔去設卡搭橋郡城至豆福濱道路不通賊乘勢復據西門土山爲礮臺益高其壘四門環攻志在必得華爾與賈益謙李恆嵩集議謂賊勢驟添致死力於我若非偪於後路官軍必將有變乃盡出所有大礮數十位洋鎗千餘桿與李恆嵩所帶中營擡鎗賈益謙所帶督標烏鎗環堞分列賊四處聚攻則以大礮轟之賊周圍馳驟則以排鎗擊之兩日夜鎗礮之聲不絕初十日甯郡調回之兵三百餘人適至與賊戰於豆福濱毀其礮臺至夜三更火光四起賊寂然無聲華爾率常勝軍及英兵五十人李恆嵩將所部九百人分門

出擊殺斃無算賊分股遁往西北次日華爾正擬往解青浦之圍而賊仍在數里外來去其大股攻撲青浦圍數十重危在旦夕英國提督何伯於十二日駛赴松城商令華爾飭挑常勝軍於十三日夜半打破天馬山賊卡由礮路衝入青城焚燒米糧船隻帶同隊伍惡戰衝出英兵頭法爾師德被賊擄去華爾且戰且退十四日撤回松郡并力防守此初九至十三日松圍稍鬆青浦撤防賊未遠退之實在情形也自賊圍青松兩城大股分紮廣富林塘橋一帶而厚集於泗涇以拒我軍距臣軍新橋前敵十餘里臣老營距新橋又三十里港汊重重賊狃於官軍之不能猝進也方日夜添築營壘爲久踞計臣欲親赴泗涇覘賊勢卽出不意薄其壘一創之十一日傳令開字營參將程學啟林字營參將滕嗣武親兵營通判韓正國等各帶五成隊先往臣親督副將滕嗣林參將張

遇春同知張樹聲守備吳長慶各營於是夜四更啟行程學啟等  
前隊已於黎明進逼泗涇賊卡賊開鎗迎拒我軍整隊擁入斃賊  
多人生擒十餘名立燬其卡餘眾竄過涇南拆毀木橋臣督軍繼  
至望見賊營棋布旗幟林立聯絡橫亙三四十里訊據生賊供稱  
偽忠王聽王納王均在泗涇要攻松江再到上海報復洋人等語  
時聞賊營掌號吶喊當飭張遇春等分撲泗涇誘賊出巢賊大隊  
突出我軍撤過橋口以劈山礮撞鎗擊斃悍逆數百名相持半日  
而退十九日賊騎數十衝入七寶臣督春垣熊樹各營馳至虹橋  
會齊前敵各帶六成隊分路前進至小渡船口臣勒大隊憑河設  
伏程學啟率洋鎗百人越橋直撲賊壘連環開放賊營人馬無聲  
忽大雨如注徐徐收隊行不數里雨止賊出千餘搖旗吶喊臣整  
軍回擊賊復少卻而雨又作急馳回營二十一日偽忠王陳炳文



偽納王邵姓糾悍賊五六萬直撲新橋營盤分十二支先於附近  
地方縱火焚燒周廐而呼由南而北自西而東四面圍襲及法  
華徐家匯九里橋已包過營後十餘里游氛直偪滬城勢極兇猛  
大隊圍攻開字營填濠拔椿洋鎗大礮拚力死撲程學啟以鎗礮  
抵禦燃火不及則擲瓢石擊之賊死隨拖隨上屍與濠平  
賊將躡以登程學啟急手燃劈山礮就勢開壁門大呼衝殺賊圍  
稍卻又排牆抵進我軍復退入營自辰至申如是者八九次親兵  
林字奇字各營亦被圍數重韓正國勝嗣武劉士奇各督放鎗礮  
擊斃悍賊數百名賊更番疊上亦四五次臣接信後兩次專弁密  
函約令內外夾擊俱爲逆阻不能達臣思賊併力撲攻前營若不  
與以痛創上海岌岌莫保乘其跳踉半日氣力疲乏及離巢稍  
遠立腳未定之際奮迅進剿機不可失遂於是日未刻分派參將

張遇春遊擊陳飛熊訓導馬先槐三營爲左路副將滕嗣林同知  
張樹聲游擊張桂芳守備吳長慶三營爲右路臣自督參將郭松  
林都司吳斌王占魁爲後路各帶六成隊進援張遇春遇賊於徐  
家匯之九里橋首先衝鋒賊以萬眾扼橋抗拒鎗礮對放屢卻屢  
前馬先槐率項字營攻其左陳飛熊率熊字營攻其右都司張志  
邦同春字營力攻中心三路併力賊陣稍亂張遇春躍馬過橋直  
取黃衣賊目賊回矛刺傷張遇春坐馬落地賊呼噪擁上張遇春  
翻身拔刀斫倒賊目奪其馬躍而上張志邦奮前斬取賊頭擲於  
賊陣賊萬眾阻然烏驚獸駭陳飛熊張桂芳張樹珊等乘勢繼進  
追至營邊賊數萬合成一路復排大陣抵死鏖戰程學啟韓正國  
滕嗣林劉士奇等臣見軍旗幟賊陣搖動各開營門一擁而出  
橫衝直刺內外夾剿賊盡棄鎗礮器械奪路狂奔自相踐踏而死

臣於馬上接晤程學啟詢悉該營弁勇被鎗礮子重傷八十餘人陣亡十人各營傷亡亦百餘人程學啟滕嗣武各受鎗子傷幸不甚重當卽督同分頭追殺直至七寶天已昏黑該逆連夜敗回泗涇是日殺賊三千餘名落水淹斃及解散脅從亦數千名生擒四百餘人奪獲洋鎗擡礮馬匹旗幟數千件訊生供僞聽王鎗斃僞納王負傷而遁各頭目死者甚多二十三日乘勝進攻泗涇程學啟劉士奇由曾家橋之右從打鐵橋進韓正國由龍珠橋中路進滕嗣武由龍珠橋左路進直奔泗涇賊營該逆喘息未定見我軍三路來攻不戰自走當將賊營數十座全行踏毀燒賊棚三千餘箇一面併力追剿賊捨死逃向崑山青浦而去其松江附近廣富林塘橋大橋等處踞賊亦全數遁走此二十一及二十三日連獲大捷力解重圍蹙平賊卡賊壘松滬各防一律肅清之實在情形

也臣查偽忠王糾合蘇杭羽黨號稱二十餘萬竄入浦西各路幾有燎原之勢雖經臣先行從事浦東勦撫兼施收復南匯川沙奉賢柘林各廳縣斷賊接應而該逆垂涎滬上一日未忘臣由上游帶來勇數本甚單薄此次悍賊實有五六萬眾併力圍攻新橋各營卽欲截斷前軍乘勢撲滬全局安危罔不容髮幸賴聖主威福軍士用命參將程學啟等堅守苦戰各將弁亦神速赴機齊心奮勇擊退巨寇殲渠埽穴肅清松滬各防固出於一時僥倖非臣與督臣曾國藩始願所及各將領臨敵勇往以少勝眾實屬異常出力應懇

皇上量予恩施以昭激勸參將程學啟可否以副將儘先推補並

賞加勇號副將銜署江蘇撫標中軍參將張遇春已保副將滕嗣

武可否均請

賞加勇號張遇春並請以副將補用游擊劉士奇陳飛熊可否均請以參將儘先補用知州銜藍翎通判韓正國可否請加知府銜並

賞換花翎守備張樹珊請留於兩江以都司補用其餘出力員弁兵勇容臣查明擇尤請獎陣亡弁勇咨部分別議卹所有官軍連獲勝仗擊退大股竄賊踰平賊卡賊壘數十座涇防肅清松郡解圍各緣由理合恭摺由六百里馳陳伏乞

皇上聖鑒訓示謹奏

權衡滬鎮緩急片

同治元年五月二十七日

再欽奉五月初一日

寄諭鎮江爲南北關鍵現在北岸肅清急宜以重兵駐紮爲進規  
江甯之計李鴻章如能抽身赴鎮則呼應較靈於大局較有裨益  
其上海兵勇該署撫亦可於抵鎮後會商曾國藩派員前往整理  
著曾國藩迅卽會商李鴻章酌量情形通籌全局如何可以帶兵  
及早到鎮先占形勝最爲得策蘇省紳士之言恐有偏私李鴻章  
必當審察定見不可過信等因欽此又奉五月十四日

寄諭現在楚軍東下已攻克太平蕪湖等城卽日進規九洑洲爲  
合圍金陵之計惟賊勢窮蹙必將鋌而走險江北尙稱完善而防  
兵單薄甚屬可虞前次疊諭李鴻章赴鎮與江北各軍聯絡一氣  
著卽恪遵前旨迅將滬防事宜妥爲辦理卽日前往鎮江整頓一

切大局所關想該督撫必不敢遲延貽誤也至滬上兵勇應如何設法裁汰整頓之處仍著李鴻章妥籌兼顧並揀派得力大員赴滬管帶以資得力等因欽此仰蒙

聖慮殷諄指示親切伏讀之下感激莫名臣接督臣曾國藩來函頗以進攻金陵兵單爲虞又接曾國荃五月初十日自金陵雨花臺來信我軍祇能圍其西南兩面深溝高壘以水師爲根本以江面爲糧路先爲自固徐圖制賊非添二萬餘人不能合圍訊生賊供洪逆調蘇湖兩處之賊回援恐成持久之勢等語臣查金陵城大而堅從前和春張國樞擁八九萬之眾圍攻日久功敗垂成今蘇浙兩省徧地賊區黏連一片處處可以進援尤與昔年情形迥異所恃楚師穩練較勝他軍賊眾多未盡精悍曾國荃以水師爲根本當可立足但軍數不及二萬其力不足以合圍卽未能制

其死命此次偽忠逆黨羽撲犯松滬負創而遁聞將連合杭湖賊  
眾赴救金陵臣深代懸慮亟欲馳往鎮江就近援助無如臣原部  
陸軍僅數千人分兩處則均不得勁專一路則尙可自立兵事重  
大臣何敢易言之也滬中官民向恃洋人爲安危乃援賊未來之  
先洋人分兵四出援賊大至之後洋人斂兵不動臣揆度夷情似  
非暗與賊通坐觀成敗實係懾於賊眾不敢向前若非臣親督兵  
將痛挫兇鋒患且不測以是知洋人不可專恃滬防必須自強臣  
忝任蘇撫旣不能棄滬中每月二十萬餉源之地又不敢緩鎮江  
接應上下游各路之師左右思維實無長策至滬上原有水陸兵  
勇逐營簡汰整頓非臣親自部署不能鈐制所帶諸將中尙有勇  
敢樸實之材實少應變馭眾之選且資望皆淺未可令其獨當一  
面臣斷不偏信紳士之言貽誤大局惟軍事以得人心爲本臣之



餉陋到滬後稍繫軍民之望未便輕自移動遽失眾心曾國藩處似亦無統兵大員可派來滬可否容臣將滬事辦妥卽移師出江以慰

聖慮抑臣更有言者馮子材等催臣前往實欲臣到鎮爲該軍籌餉未必爲進剿起見現在江北完善地方所出之餉專供都興阿一軍尙無缺乏畛域已分江南止存鎮滬兩處每月僅能由滬分給三萬無地可另籌鉅款臣實深內愧馮子材尙能戰守而兵勇疲情已非一日長江師船大半朽壞劫奪成風臣卽頡頏其間止能自立一軍未便控制諸將若輕言整頓先失利衷之義若親軍太少亦無整頓之資此皆實在爲難情形臣不敢稍有徇隱謹先附片密陳伏乞

聖鑒訓示謹

奏

代徵長江洋稅急難籌解摺

同治元年五月二十七日

奏為查明江海關代徵長江稅及本年春季江海關收稅各銀數分繕清單並軍餉萬緊急難籌解情形恭摺具陳仰祈

聖鑒事竊本年正月十四日奉准總理各國事務衙門咨行鈔片內開漢口九江雖已通商而進出稅鈔均係上海徵收實在上海關共代收九江稅若干代收漢口稅若干查明數目派員解交湖北江西二省以濟軍需等因奉

旨依議欽此當經前撫臣轉飭遵辦去後嗣准湖廣督臣官文委派湖北候補道張曜孫來滬催提代徵洋稅疊經臣等飭令江海關查明數目分別撥交在案茲據海關監督蘇松太道吳煦詳稱漢口九江運土貨出長江正稅並復進口半稅由上海徵收係遵照定章辦理江海關所收漢口九江來貨之進口正稅即係代徵

漢九兩關正稅所收由上海運往長江各貨之復進長江半稅卽係代徵漢九兩關復進口半稅滙關並無別項進口稅餉當卽督飭稅務司費士來確查代徵漢九兩關銀數旋據復稱前二項稅款該司稅於上年十一月初一漢口開關之日起卽將所收稅銀月冊登記特是各商船來往長江一船之內時有漢口九江兩處之貨目運入長江貨物洋商並不逐一報明孰爲運往漢口孰爲運往九江卽偶有報明亦難保報往漢口者不因漢口價低改往九江報往九江者不因九江不能得價改往漢口以致兩關稅銀難以分晰若長江通商以來漢關未設以前該司稅初不料漢口月行設關又不知復應割還已將所收該兩口稅數載入本關徵收簿日久款多難以剔出卽時彙報應請照會漢口九江詳細注明各該口起下貨稅便可據以分別江海關代徵之數等語該道

覆查運入長江之貨必須知其實在何口起卸始能指爲何關進口之稅長江運出之貨亦須知其從何口下轍始能指爲何關出口之稅乃洋商運貨入江得價則售市價既有低昂銷路須從其便漢九兩處卽該商亦不能預定其自長江運貨至滬究係來自何口多未報明卽偶有報明亦難據以爲憑是進出兩項均未便由滬懸擬強爲分別業經道冊詳請前撫臣薛煥咨查漢九二關各自填注在案至此項代徵之稅不應隨時解還惟上海賊氛環逼堵剿喫緊自去冬以及今春各防兵勇數逾五萬需餉浩繁咸豐十年冬間曾經前撫臣薛煥奏明請將上海關稅釐捐儘收提充本省餉需又是年奉撥京餉八十萬兩亦經前撫臣奏奉戶部議准自蘇常失陷僅存上海一隅設法防剿入不敷出尙係實在情形應俟該省軍務稍定分年籌補等因奉

旨依議欽此欽遵轉行遵照在案現在統計每年洋稅收數不過二百餘萬每月僅收銀二十餘萬除照章核扣英法各二成賠款外月稅不過十餘萬兩代徵漢九二關之稅卽在其中連所收釐捐併計亦祇二十餘萬而每月兵餉軍火卽須三十餘萬加以協濟鎮江等處兵餉本省俸廉兵米等款及京外飭撥緊要之款無不取給於稅捐目前之入不敷出卽可知從前之收不敷放以致墊欠纍纍一籌莫展決裂堪虞不得不援照舊案請將前項長江稅課先行留抵上海防勦餉需一俟軍務稍定遵卽趕緊解還一面督飭該司稅將上年十一十二月至本年正二三月代徵銀數逐一準核開具代收長江稅並本年春季江海關收稅細數清摺兩扣呈請奏咨各等情前來臣復查上海關稅儘數提充本省軍餉數年來辦有成案匪自今始臣在安慶時道路傳聞每月滬關

收稅有四五十萬之說到滬後留心察訪乃知浮言未可盡信接任以來屢向吳煦面詰該關所收洋稅確數據稱新關洋稅係稅務司費士來經收登簿確有案據關道雖總司其成不能絲毫撓越洋人收稅向極認真如稍有不實不盡洋商斷不依從既登簿冊卽儘收儘解非比內地各關積習書吏可滋弊混因將本年春季所收稅數清摺呈核臣查摺內所開至旺之月除扣賠款及船鈔外僅得實銀十餘萬衰月僅及十萬代徵長江稅尙在其內則收數並不爲多臣四月十五日莅任視事以前其留抵軍需各款均係前撫臣薛煥任內之事其自四月十五日以後爲日無多代徵之數計亦無幾業經遵照部行劃撥湖北應解京倉米價銀七萬兩似足相抵而滬關究竟代徵漢口九江稅各若干業經造冊咨請自行填注必俟注明咨復始能分別劃抵況上海爲蘇省一

錢餉源有涇地然後有稅餉今蘇杭踞逆切近窺撲必欲得而甘心洋人雖議助防究係未可專恃自須練成一支勁旅以保重地而張

國威若將代收之稅盡數撥還餉必不繼則兵亦不能練松地舊有兵勇經此次大股逆賊衝潰已山臣遣散一萬五千餘人內又選派將領挑收精銳二千餘人加以臣由上游帶來水陸萬餘人及各防水陸舊部並南匯降卒英法各國礮勇合之仍不下四萬卽逐漸裁汰該處地勢平坦頭頭是道欲保上海卽不能不兼守松江寶山及浦東各廳縣人數太少亦不濟事臣日夜焦籌罔知所措綜計松涇軍餉及鎮江協款並製造軍火賞卹各項得人綜核每月亦須銀三十餘萬兩近更不撥總司稅赫德置辦輪船餉礮等價銀二十五萬兩又商運京倉米石先付價銀十一萬三千



兩此皆必不可久之款又奉撥袁甲三軍餉每月二萬兩催催日  
緊實屬應接不暇據該署司吳煦稟稱上海月收釐捐銀十餘萬  
關稅銀十餘萬專抵本處兵勇糧餉尙多不敷除由臣嚴查積弊  
隨時設法整頓撙節動支並將奉撥要款督飭該署司趕緊挪解  
外可否籲懇

聖主鴻慈俯念微臣到任未久軍餉竭蹶准其循照舊案暫將代  
徵漢九兩關之稅先行留抵俟赫德赴鄂議定設關章程再陸續  
籌款補解俾臣訓練兵勇藉資鼓勵合力進剿以順大局而保危  
疆臣不勝悚息感盼之至所有查明江海關代徵長江稅及本年  
春季江海關收稅各銀數分繕清單恭呈

御覽並軍餉萬緊急難籌解各緣由謹會同兩江督臣曾國藩通  
商大臣臣薛煥專摺馳陳伏乞

奏  
皇上聖訓示施行謹

進剿浦東獲勝摺

同治元年六月十三日

奏爲官軍進剿浦東獲勝情形恭摺具陳仰祈

聖鑒事竊五月二十一二十三等日擊退松滬賊逆業經專摺馳報在案自虹橋泗涇大股敗遁浦西附近各處均暫安堵青浦嘉定仍有悍賊分守潛伏不出疊飭參將程學啟等乘勝襲攻青浦適值陰雨兼旬湖河盛漲該縣城外港汊橋梁均被拆斷無路可進應再厚集兵力徐圖進取至浦東一帶經知府潘鼎新都司劉銘傳收復南匯川沙後督同投誠勇目史建瀛劉玉林於五月十一日攻復奉賢縣城潘鼎新劉銘傳進紮該縣派劉玉林所部千人進紮柘林探知逆眾盤踞金山衛聯營數十里直至浙江之乍浦並分踞離柘林十二里之漕涇鎮以阻我師五月二十八日潘鼎新飭令劉玉林帶隊進攻屢衝不動劉玉林傍晚撤退密爲布

置卽於是夜初更出其不意分路劫營二更行抵漕涇當令哨勇於黑暗中四面埋伏忽號礮一響我兵大呼掩殺鎗礮噴筒周圍施放該逆猝不及防紛紛驚竄登時燒燬賊營三座殺斃及人馬踐踏落水死者不計其數劉玉林連夜帶隊追擊三十餘里至金山衛城將東北門外賊營盡行踏燬殺賊千餘生擒五十餘名該逆入城堅守適大雨如注二十九日午刻收隊回營查點我勇陣亡十八名受傷三十六名連日探聞金山衛踞逆以大股屯於西路二十餘里爲之犄角又由浙江添賊數千冀圖合股再逞劉玉林吳建瀛等時時派隊迎剿疊獲小勝臣查浦東數百里之地漸就肅清惟金山衛一城爲江浙毘連要隘必須速圖攻克以重兵屯守庶柘奉川南各廳縣門戶可保上海松江對面局勢亦寬因飭潘鼎新劉銘傳率同吳建瀛各營進紮漕涇由海塘進東北一

路並調副將華爾帶常勝軍千人同參將李恆嵩由張堰進西南一路會攻金山衛城又調副將銜參將覃聯陞帶陞字營湘勇進紫奉賢爲後路援應除俟攻勦得手續行馳報外所有官軍進規浦東獲勝情形繕摺馳陳伏乞

皇上聖鑒謹

奏

上海西兵情形片

同治元年六月十三日

再六月初四日欽奉五月十七日

寄諭總理各國事務衙門奏外國與賊接仗構釁甚深聞將調集印度兵大舉助剿請飭江浙督撫迅速籌議一招據崇厚面稱英領事吉必勳聲稱青浦嘉定二城難以抵禦現在退回上海休息有月調印度兵前來秋間大舉之說該王大臣等慮及外國兵入內地攻剿不特得一處代守一處足爲中國腹心之患卽得一處焚燬一處亦實地方瘡痍之災請飭曾國藩等設法防範等語英法兩國與髮逆仇隙已深若調大兵分路進攻盡如嘉定青浦之事則利不償害且恐守以西兵運掉不能由我爲患曷可勝言萬一金陵尙難遽拔而印度大隊已到應如何預籌會攻不致授柄於彼之處著會商妥議等因欽此

臣查英法兩國退出嘉定青浦

情形疊經奏報在案該國提督先與臣定議原派中國兵勇三千  
外國兵三百協守嘉定華爾所部專守青浦乃援賊大股驟至合  
圍洋人苦守旬日力不能支乃挾中國兵遽行退出並未及一一  
焚燬嗣經臣督軍離退援賊該逆仍分守嘉青二城布置完好如  
果被外國兵焚燬淨盡髮逆亦不能再守是其明徵聞上海洋商  
眾議因嘉青敗退頗損外國兵威私相詬怨以英法提督辦理不  
妥遂有秋後調兵入粵之說昨英國水師提督何伯過臣營探問  
上下游各路軍情臣即而詢有無秋後調兵成議所調係何國之  
兵據稱八月以後本國有兵萬餘來滬再復嘉青布置嚴守然只  
在上海附近百里內攻勦不便遠征該提督並稱本訂於六七月  
回國換防因此遲留等語並未據指明調印度兵臣查洋人性情  
堅執不受商量其陸軍不紮營壘專恃礮火故賊少則操必勝之

券賊多則生疑怯之情中國兵勇先須紮營自立腳步與外國會攻遲速進退實難強與之合臣俟此間布置稍妥應遵

諭旨移駐鎮江行止未敢自定且得力兵勇人數較少若以孤軍深入有戰無守有勦無援似非穩著若須留滬進取當另籌自強之策洋人卽調兵助勦只可曲意羈縻仍須各打一路方不致授柄於彼細察夷情嘉吉復失該提督等既深內愧卽秋後訓集重兵不過復此二城以雪前憤或不遽深入爲患再查閱英國六月初七日新聞紙內有云漢口有地一處英國要買價未議定但華官作事不甚快速最好英國代華官攻破一城俟此地講定再行交給城池等語卽此見洋人詭詐多端未知湖北督撫曾否留心防備除疊奉

寄諭飭查各節再由督臣曾國藩核奪會奏外所有上海西兵情



形謹先附片縷晰密陳伏乞

皇上聖鑒訓示謹

奏

上海一口豆石請仍歸華商裝運片

同治元年六月十三日

再本年正月各海口豆石開禁准令外國商船運售原爲北洋海防緊要資其協衛不得不略從寬大以示羈縻遵卽轉行司道徧貼告示曉諭商民茲據江海關監督吳煦轉據船商王永盛等聯名稟稱沿海編氓自開北洋海禁以後造船出海各隨地產土著販運懋遷迄今二百年來藉此謀生無論何項捐款商船首先報效卽如海運漕糧商墊采辦南米運津皆藉商船承辦

國計民生不無小補是以和議條內有外國船不准裝運牛莊等處豆石一款奉經照准在案現在各口通商凡屬生意馬頭外國已佔十分之九惟贛登州牛莊裝豆一款係商船謀生之路今若一網打盡則中國商船立見廢棄沿海居民生計壅阻目下軍需從何而出將來海運從何而辦於大局煞有關係並稱天津海口

本來無豆可裝登州牛莊除豆之外外國船均在貿易自可保護或因事有成議設法變通各口豆石生意准外國商船貿易專將上海一口歸內地商人運銷庶幾網開一面以拯商民環求通詳請奏等情並據該關道詳稱查江浙沙蛋等船航海往來貿易其自南往北者貨不拘一而自北回南者總以豆貨爲大宗卽滬地生意向以豆市爲最大今若外國船隻亦能裝運是該商船向藉此謀生者一旦爲洋商所佔則該商船所稱立見廢棄關係軍需海運係屬實在情形惟事已成議經奏奉

諭旨允准勢難更改可否設法變通俯如所請將豆石一項各口准令外國商船裝運銷售專將上海一口仍守前約俾歸內地商人轉運庶於華商生計稍留餘地實於餉捐兩有裨益臣查核原詳係體恤華商卽爲顧全軍需海運起見於現議豆石弛禁一案

尙不違背相應據情奏請

敕下總理各國事務衙門核議請

旨遵行除咨明總理衙門外所有眾船商求將上海一口豆石仍  
守前約俾歸內地商人轉運緣由理合會同通商大臣臣薛煥附  
片具陳伏祈  
聖鑒訓示謹  
奏

克復金山衛摺

同治元年六月二十五日

奏爲官軍連日攻剿奪燬海賊卡要隘乘勝克復金山衛城浦東全境肅清恭摺馳報仰祈

聖鑒事竊浦東一軍攻克漕涇鎮後飭調潘鼎新華爾等分路會攻金山衛城經臣於本月十三日專摺

奏報在案十四日鼎銘各營帶同吳建瀛二營由漕涇進紮南沙距金山十五里潘鼎新等議以近城二里許賊營圍紮海塘攔路設卡左海右河若不力破此卡無由直薄城根商令劉玉林帶隊前往察看劉玉林見右河埂下賊樁攔處水尙不深遂同方有才等陸續試水而過掩至塹邊齊聲吶喊該逆僅以鎗礮在內施放鼎銘二營隊伍繼至前後夾擊火器齊施延燒賊棚遂乘逆眾驚惶搶拔籤樁劉玉林方有才等踰濠齊進賊首憑牆搖旗指揮被

我軍迎面砍倒眾匪紛紛出竄斃於河海刀矛者不計其數城中大股來援復經擊退我軍回營後賊連夜修整營卡益以死守十七日潘鼎新令軍功潘鼎琛徐道奎率三成隊伍復攻此卡逆眾抗拒多時被我軍銃斃甚夥賊聞然撤退潘鼎琛等乘勝追至城下斬賊數十級奪獲賊旗四十餘面我軍亦有傷亡正撤隊開南門突出賊二千餘眾蜂擁奔來我軍整隊徐退離城約五六里適潘鼎新等帶親兵三十餘人由三陽等處探視金山衛東北地勢猝遇賊眾見我人數甚少直前兜襲劉銘傳勒馬當先手放洋鎗斃其騎馬賊目賊眾卻立勇丁傷亡數名因令劉玉林移營進紮三陽賊遂盡逃入城此十四至十七日連破城外賊卡滾營進逼之實在情形也十八日參將王聯陞由奉賢帶隊亦到南沙十九日偕同都司胡鵬飛率五成隊伍并親兵百餘名由海塘直抵城

根賊於城外豎紅旗誘戰覃聯陞知有埋伏飭令各哨勇丁按隊徐行賊分三股一伏海塘壩外一伏隄內一由隄上直趨我隊守備陳德勝以右哨當頭迎抵高振彪以左哨攻擊隄外文清林周河清率前後哨排列鎗礮以防抄截覃聯陞自率親兵左右策應衝突再四陳德勝持矛刺取黃衣賊曰洋礮飛子從陳德勝腦左打過賊曰應手斃於矛下陳德勝亦立時倒地文清林馳前救護連斃數賊身亦受矛傷多處與陳德勝先後陣亡覃聯陞憤不顧身拍馬衝入賊隊被矛刺傷右腿戢立馬下親兵隊從旁猛開劈山大礮擊倒馬賊眾哨亦合爲一處人人拚命正相持間潘鼎新先派把總徐道奎帶隊由坂中突出接應覃聯陞督戰益急賊遂撤退入城是晚副將華爾同參將李恆嵩遵臣札調帶常勝軍一千餘名先後到營當與潘鼎新等會議紮營城根以便施放大礮

二十日黎明華爾督隊由海隄前進離城二里許該逆仍先埋伏千餘人意圖截其後路常勝軍以鎗礮轟散逆眾直偪城下潘鼎新等率同胡鵬飛劉玉林等由三陽進紮金山東門外賊由城內衝出數百名經劉玉林方有才前營擊敗匪城不出該員等察看地勢排列鎗礮預備相機施放訂於五更時分四門會勦我軍甫開鎗礮據報劉玉林已先入城賊大股向西北潛遁潘鼎新等一面派隊跟追一面入城分營布守卽於六月二十一日丑時克復金山衛城華爾本日卽回松江軍聯陞亦回奉賢此十九至二十一日偪城擊敗伏賊分路進攻立復金山衛城之實在情形也臣查金山衛爲江浙要衝浦東咽喉自上年八月被賊攻破此城奉柘川南各廳縣相繼失守於是上海松江對面皆賊僅隔黃浦江一綫之路勢甚岌岌本年三四月間英法將士攻奪周浦南橋賊



疊先克柘林臣接任後卽派潘鼎新劉銘傳帶淮勇千人設計招降南匯賊萬餘浦東各城賊皆搖動潘鼎新等撫有降眾遂資其力乘機勦辦連復川沙奉賢節節進紮時時苦戰賊猶欲堅守金山扼我之吭復連合華爾一軍併力倡攻降酋劉玉林奮勇當先疊破卡隘賊膽已落疊次設伏又不獲遂於官軍進圍之際棄城竄往浙境計未十日克復嚴疆從此浦東全境肅清門戶可守堪以仰慰

聖廬此次陣亡守備陳德勝千總文清林應懇

敕部從優議卹其尤爲出力之江蘇補用知府潘鼎新智深勇沈由舉人帶勇打仗久著戰功可否仰懇

天恩免補知府俟服闋後遇有江蘇道員缺出請

旨簡放並

賞戴花翎卽令統領浦東防務遊擊銜都司劉銘傳膽略過人可否免補遊擊以參將仍留江蘇補用並請

賞加勇號副將銜參將單聯陞可否以副將儘先推補劉玉林前經奏明暫給虛銜頂戴可否以都司補用並

賞戴花翎江南提標中營參將李恆嵩可否開復革職留任處分其餘在事出力文武員弁兵勇容臣彙入南匯虹橋請獎案內擇

尤保奏出自逾格

鴻慈所有官軍攻毀海塘賊營要隘乘勝克復金山衛城緣由理

合繕摺山六百里馳陳伏乞

皇上聖鑒訓示謹

奏

察看泖澱各湖水路情形片

同治元年六月二十五日

再臣於本月十四日同黃翼升前往泖澱各湖周歷各營察看水路情形已於十三日附片

奏報在案十六日行抵松江十七日由泖湖赴澱山湖該處係青浦崑山蘇州吳江交界直達蘇境之太湖其東岸有曾秉忠部下破船扼守西南北岸處處賊區臣與黃翼升督同淮揚四營駛往巡視十八日黃翼升巡至離蘇州七十里之周莊鎮見水陸賊軍據橋爲卡飭令副將王東華等排礮齊攻焚毀賊卡逆眾登岸開洋鎗抵拒黃翼升督軍截住賊船攔頭夾擊王東華帶隊上岸迎勦參將張元龍楊宏勝分路進剿賊紛紛敗走黃翼升由後河抄出當將賊巢燒燬共殺賊十餘名焚奪賊船十餘隻俘獲鎗礮刀矛旗幟黃衣帽四五百件十九日以後復回泖湖會合已革提督

曾秉忠由章練塘于匯鑾官廟繞至洙涇漸近浙江嘉善平湖各縣邊界二十二日回至上海老營臣查松江以西與蘇州接壤南與嘉興接壤湖河泛漲支流港汊千百縱橫岸低橋少水戰最宜將來夾攻蘇浙必須由此取徑惟頭頭是道面面皆通須有得力舢板飛划四五百號乃敷分進牽制之用黃翼升所帶戰船僅二百號除分留金陵揚州六營共百二十號外到滬僅八十號臣現將黃浦舊存礮船修整改造三四十號尙未竣工仍須會商曾國藩另籌辦法淮揚水師自去春成軍協剿鄂皖江西各處血戰踰年寒暑無閒克復名城數十此次由九洲洲賊壘橫衝而下弁勇傷亡近百名船身多被賊礮洞穿須趁三伏油艖修補臣商令曾秉忠嚴束所部堵前面各隘口俟黃翼升船隻修好再行添調前往抽替會籌防剿理合附片陳明伏乞

皇上聖鑒謹奏

奏調劉秉璋片 同治元年六月二十五日

再臣等次請調各員欽奉

諭旨允准其在皖楚上游者經曾國藩與臣分別行催尚未到滬此閒不乏才智之士習氣較深近日官場雖漸知儆惕然變化愧厲俟諸異時治軍籌餉均須得人襄助爲亟查有翰林院編修劉秉璋沈毅明決器識閑遠能耐艱苦臣與爲道義交十有餘年深知其結實可靠該員去冬山安慶經過督臣曾國藩一見大加器許謂爲皖北人才臣今春統軍來蘇曾國藩允爲奏調臣營學練軍事昨又函催臣自行奏請該員與臣所帶淮勇各營官多相浹洽可否請

旨飭赴臣軍酌量委任又新授浙江金華府知府徐寶治現抵上海爲賊所阻不克赴任該員係江蘇吳江人品端才潔可否暫留

臣營差遣俟道路疏通再飭赴浙之處伏乞

皇上聖鑒訓示謹附片具

奏

進攻青浦並扼守金山衛摺

同治元年七月十三日

奏爲官軍進攻青浦並金山衛城設守情形恭摺馳陳仰祈

聖鑒事竊六月二十一日克復金山衛城業經專摺馳報在案七

月初七日欽奉六月二十六日

寄諭李鴻章片奏洋兵不守青浦嘉定現尙爲賊堅踞疊飭參將程學啟等進攻青浦能否厚集兵力趕緊克復如將來洋兵到後我軍卽與分路攻取縱使洋兵克復城池仍應我軍駐守以免流弊等因跪誦之下仰見

宸謨廣運籌及萬全曷勝欽佩查青嘉各城賊誘之既不來戰必須官軍進偪次第移營攻取爲先發制人之計臣密飭參將李恆嵩探明進攻青浦路徑於河港歧出之處搭造浮橋以利師行派令副將程學啟率開字三營副將滕嗣武率林字兩營通判韓



正國率親兵兩營於七月初七日自虹橋拔隊前往北幹山去青城十餘里相地修築營壘參將劉士奇郭松林各率所部紮塘橋後路又派臣弟分發知縣李鶴章率本標親兵及樹字營馳往督攻初十日各營先後到齊濠壘甫竣又調副將華爾由松江帶隊來會定議進攻日內計可直抵城下其如何攻剿情形俟報到卽續具奏至浦東金山衛城克復後責成知府潘鼎新會同參將覃聯陞都司劉銘傳以所部分駐要隘益以吳長慶一營吳建瀛三營歸併扼守臣復委臬司劉郁膏前往會商潘鼎新查勘海塘及河道形勢加工濬修爲穩守計據稱海塘外灘宜開長濠塘內迤北舊河西接黃姑壩向南繞至金家橋東歸張堰大河節節皆須挑濬俾河路曲折皆通水師可以駛入援應再勘得衛城東面海塘受潮怒激塘埂衝潰不過幾尺勢甚危險已籌借款項趕緊分

別修築藉地利以省兵力所有官軍拔營進攻青浦並金山衛設  
守各情形理合繕摺馳陳伏祈

皇上聖鑒訓示謹

奏

奏通靖等處江港請飭嚴防摺  
同治元年七月十三日

奏為欽奉

諭旨恭摺覆陳仰祈

聖鑒事竊臣等欽奉六月十八日

寄諭潘祖蔭片奏楚軍乘勝近逼金陵大局安危所繫鎮江揚  
州已有備禦惟通州靖江泰興等處江港可通者十餘處由江南  
太倉常熟江陰出口即能闖入賊若乘虛擾及裏下河等處江北  
軍餉無籌即全師不壯等語著曾國藩李鴻章設法兼顧派令妥  
員防守保全完善之區原摺片著鈔給閱看等因欽此臣查江防  
大段由靖江而上至瓜洲為內江由靖江而下至海門崇明為內  
洋自瓜洲至通州五六百里向皆責成各水師分防其南岸之江  
陰口福山口徐六涇口楊林口劉河口賊巢密布時時出江搶擄

船隻游匪劣勇遁逃句結臣自四月接任後疊經咨飭李德麟等分段巡緝並咨商黃彬設法堵剿六月間江洋盜劫之案日凡數起商船阻絕南北不能通行經臣商調副將華爾帶輪船隊伍於七月初二日出尖淞口就近剿劉河賊巢毀賊卡三處攻奪該口內新老兩鎮救出商船三十餘隻難民數百平其方圓礮臺二座斬短髮粵人七八百名洋鎗斃其乘馬悍賊土人指爲粵賊頭目楊姓者也其自楊林口而上接連通靖江港紛錯可以漏賊者何止十餘處竊意江南全局鮑超由東壩進曾國荃由金陵進秋冬以後賊必不支上游無懈可蹈卽恐併出南岸各口就食於裏下河州縣而狼福江而遼闊巨浸泊天一經偷渡闌入通如卽成噬臍之患臣每與督臣曾國藩緘商深用焦慮署提臣黃翼升所帶水師皆長龍舳板於洋而風潮沙性實不相宜現暫留副將陽利

見蔡東祥所部四十船巡防三江口兵力單薄勢難兼顧他處其餘一百數十號調入松江泖澱各湖頭頭是道尙不敷用曾秉忠礮船現已裁撤大半合之黃翼升新營祇可專力湖防至於通靖江防似應仍責成黃彬所部師船肅清江而嚴防北竄計年內外赫德購到船礮定可得用或俟九洲克復由督臣曾國藩商之楊載福彭玉麟分一軍下駛則一切皆資整頓不獨爲外江內河設防已也惟目前別無救急之法可否請

旨敕下都興阿黃彬妥籌布置嚴飭諸鎮將實力防禦通靖泰興各口岸儻有疏虞俾賊闖入裏下河卽惟分防之鎮將是問再上年都興阿黃彬奏調廣東紅單船四十號來江助剿本年復委郭定猷赴粵守催臣查原奏本以舊船間多損壞調到新船裁替而現據南臺候補道許如駿詳稱黃彬以裁船原議籌給一月餉銀

以作路費又有不給餉銀起行仍在江南隨幫按成攤放舊欠之說是新船入江仍未能即撤舊船由該臺營次詳請月籌新餉專款前來臣復查南臺進款分供水陸兩軍實已萬分拮据現經臣核定餉章月片附陳何能再有增益况赫德所購外國船不久必到當蘇餉艱窘之際豈能議添兩分重餉此項紅單等船調到若使枵腹荷戈豈得毫末之力若仍自求口食尤開騷擾之端查水師各幫內原續雇紅單船七十七隻兼之大洋艦快蟹拖幫各項戰船共三百餘號目下縱有抽減約計以船身稍舊者旋泊駐防以其稍堅固者出江堵擊似尙足敷調撥其新船到防之期計與赫德戰船不相先後兩項相較洋船已別無變動之法紅單尙可在緩議之條籌思至再惟有併請

飭令都興阿黃彬暨廣東督撫臣將前調紅單等船四十號卽行

停止如已報起程無論駛至何處卽速追令回粵勿庸來江以節糜費所有欽遵

諭旨設法保全完善之區請飭水師鎮將嚴堵通靖泰興各港口并請將前調廣東紅單等船四十號卽行停止各緣由會同協辦大學士兩江督臣曾國藩專摺覆陳伏乞

皇上聖鑒訓示謹  
奏

釐定鎮江水陸餉章片

同治元年七月十三日

再鎮江軍餉經臣於四月內據蘇藩司議詳

奏定由滬每月撥濟銀三萬兩查照糧臺水陸分攤之議故未經

指定專解陸營續經署漕臣吳棠遵

旨核將泰壩鹽釐每引劃分三百文以濟鎮餉各在案惟江南糧  
臺各進款分供水陸向無定章以致彼此催提始而文移往復繼  
則連章入告各執一詞迄無定議當防剿吃緊之際若不秉公衡  
斷釐定餉章請

旨飭遵誠恐爭競不已有礙大局經督辦糧臺署漕臣吳棠與臣  
往返咨商據南臺候補道許如駿疊次原詳覆加斟酌查該臺進  
款以沿江釐捐上海協餉口岸鹽釐為三大宗沿江釐卡每月約  
收銀二三萬兩既歸各幫水師就近提用則滬餉三萬兩除水陸



各營米價八千兩及福山鎮總兵鞠輝乾所部月餉一千八百餘兩外其餘二萬餘兩應卽全解鎮營口岸鹽釐每引捐銀二兩七錢五分每月約收銀一二萬兩內除瓜洲防兵向按九十天一關由淮運司在於此項鹽釐每月巡提銀五百七十兩交水師局員領給外餘卽儘數按月分解水陸兩營此外除蕩捐一項有名無實業經停止其泰甯鹽釐每引劃分三百文每月約得銀三四千兩專濟鎮營至如花布釐捐歲可收錢六七萬串焦山貨捐歲可收錢十餘萬串揚由關稅及鎮江洋稅兩項每月約銀千數百兩以後旺收與否未能預定廣東協餉

奏准每月三萬兩又添撥水師每月二萬兩久未報解現經臣等專員咨催又如江北捐借及革員王藻等捐款雖屬畸零或可催解若干以上各項均以五成歸鎮營四成歸水營其餘一成提爲

水陸兩營製造軍火並臺局委員鹽折局用之費如有不足仍在  
花布釐捐及捐借項下動支統計鎮營餉數原額多於水營半倍  
是以分攤稍爲從寬並非偏厚惟目下進款止此只可就現有之  
數酌量分濟同甘其苦如此後各軍攻剿出力軍務地方漸有起  
色別有可籌之款容臣等隨時通融籌辦至於水營額餉六萬非  
盡口糧且有船價在內其沿江釐卡上自儀徵沙漫洲下至通州  
海門各口縣互數百里該水師鎮將自行設卡三十餘處如能核  
實收放滴滴歸公當可敷用而近來所收月不逾二三萬兩此則  
該營當自爲整頓無事舍近而求遠者也所有臣等釐定鎮江水  
陸餉章請

旨飭遵緣由除咨戶部外謹會同署漕運總督臣吳棠附片具陳  
伏祈

聖鑒訓示謹奏

江海關洋稅第六結並免單稅無從撥還摺

同治元年七月十三日

奏爲江海關徵收洋稅第六結扣交英法兩國各二成銀兩掣取收單並查明免單稅銀總數現已儘抵軍餉無從撥還恭摺奏祈聖鑒事竊照英法兩國賠項各銀八百萬兩按照條約應於各關洋稅內分結扣交各二成以外國三箇月爲一結其江海關第一結至第五結已由關道照數扣交共銀一百七萬三千八百三十八兩一錢二分二釐八毫節經前撫臣薛煥

奏報在案又查接管卷內免單稅銀一項經總理各國事務衙門奏定分別撥解並嚴飭關道每屆三月一結之期將實發免單張數稅銀收目於摺內詳細聲敘造冊送部至不扣二成之船鈔子稅及土貨半稅各數目並於摺內聲明等因當即督飭關道欽遵查明辦理茲據該關道吳煦詳稱英法兩國領事以第六結屆期

請照向章覈扣查自咸豐十一年十二月初二日起至同治元年三月初二日止係外國三箇月一結第六結期滿計江海關徵收各國洋商進出口洋稅及進口洋藥稅實共銀六十八萬五千七百五十六兩一錢五分三釐應扣交英法兩國各二成銀十三萬七千一百五十一兩二錢三分五毫總共四成銀二十七萬四千三百二兩四錢六分一釐照數兌足分別移送英領事麥華陀法領事伊擔親收取具收單在案其第六結期內免單稅銀除鎮江一口並無給過免單甯波一口被陷停止通商外實發各口免單稅銀天津五萬三千六百六十五兩九錢二釐牛莊二千八百七十七兩八錢五分九釐登州七千五百八十八兩一錢七分四釐漢口七千八百五十九兩四錢四分九釐江三千一百八十兩三錢廣東五百五十八兩四錢四分五釐汕頭六十一兩七錢二分三

釐福州七百四十一兩一錢四釐廈門一百四十一兩四錢二分  
五釐另造清冊送部查覈至海關所收稅課銀兩應係儘撥江南  
大營軍餉自蘇垣失陷上海添兵募勇辦理防剿經前撫臣薛煥  
奏准儘所收釐捐關稅抵放軍需祇以餉絀兵多中外錯處繁費  
益增入不敷出無論已徵之稅動用無存卽續徵之稅亦隨收隨  
放上海爲餉源重地有上海然後有關稅若按各口免單紛紛割  
還則當此逆氛徧地江浙處處梗塞上海銷數無幾海關所收之  
稅幾將盡數撥還他省軍餉定致虛懸一經餉竭兵譁大局何堪  
設想再四思維無從分別撥解應請俟蘇省軍務稍定再行議撥  
以保危疆而免決裂等情詳請具

奏前來臣復查上海防剿吃緊免單稅銀業經儘數抵放軍餉委  
係實在情形可否懇

恩暫准留用俟蘇省軍務稍定再行撥還之處出自

逾格鴻慈除分咨總理各國事務衙門暨戶部查照一面飭令該  
關道趕造清冊月行送部外理合會同通商大臣臣薛煥恭摺附  
驛具陳伏乞

皇上聖鑒再第六結期內江海新關其徵洋船鈔銀一萬九千八  
百三十一兩三錢八分三釐又徵內地子口半稅銀一萬八百九  
十六兩九錢九分又徵復進口半稅銀十一萬七千一百四十三  
兩八錢六分四釐除照章於三箇月限內原包原貨出口給還銀  
九萬三百三十兩五錢一分二釐外實其徵收復進口半稅銀二  
萬六千八百十三兩三錢五分二釐均不扣二成合併聲明謹  
奏

查明江海關代徵長江稅內並無洋貨進口稅片

同治元年七月十三日

再查明江海關代徵長江稅銀並軍需萬緊急難辭解緣由經臣等於本年五月二十七日恭摺馳

奏奉

旨戶部總理各國事務衙門知道單二件併發欽此欽遵在案惟查官文原片內開洋商由上海運洋貨進長江又由長江運土貨回上海應完長江進出口正稅及土貨復進長江半稅均令在上海完交以上皆係長江應收之稅等語因思洋貨向無一貨兩稅之例既完海關進口稅即不能再完長江進口稅所奏恐與例未符且聞江漢關已奏明於七月初一日照更定新章起徵事關稅款出入若不確切查明必多轉轉當飭該關道吳煦復查去後旋



據詳稱上年總理各國事務衙門奏定各口通商章程第一款內載洋商由上海運洋貨進長江須在上海將進口正稅完納等語則湖廣總督所奏不爲無因但查洋貨以先到之關納稅爲定既在進口之海關納稅無論轉運何口均准給免照免其重徵自道光年間五口通商以來各海關一體照辦天津新定條約亦復相同漢口九江兩處既准通商辦法自當一律若一貨兩稅洋商狃於成例恐難允遵所有長江通商以後上海關代徵貨稅祇有長江運來土貨應完漢口九江出口正稅及由上海運入長江土貨應完漢口九江復進口半稅兩項其由上海運入長江洋貨應係遵照條約給發免照委無代徵長江進口正稅等情請奏前來臣覆覈無異相應請

旨敕下總理各國事務衙門並湖廣督臣查照辦理昨總稅務司

赫德由鄂回滬臣雖未接晤據薛煥吳煦均稱該總司稅熟悉各  
關稅務深知原委現擬赴京應如何分別收徵諒可議定第查蘇  
杭疊陷以後僅存上海一隅爲各貨匯聚之所並非各貨行銷之  
所祇緣先在海關納稅並代收各口正半各稅是以收數較旺然  
除扣英法四成外每月至多不及二十萬少則十餘萬儘放松滬  
正餉鎮江協餉計尙不敷而遠近各省視爲膏腴傳聞異詞咸將  
取給於此其隨時特出之款奉撥之款不一而足通計每月用費  
約需四十萬卽連本處捐釐併計久已萬難支撐今江漢關自行  
徵稅各口又索免單銀兩則此後海關應收之稅更少各軍餉需  
及會防經費從何取給決裂恐在目前臣受  
恩深重方欲練成勁旅隨同諸將帥規復舊疆無如稅額驟減軍  
餉日絀臣適逢其會動多掣肘惟有督飭司道力求撙節以待事

機之轉亦不敢徒事呼籲上煩

慮慮因查明江海關代徵長江稅內並無洋貨進口稅一層不得不據情申辯並將滬餉前後大略附便陳明伏乞

皇上聖鑒訓示謹會同通商大臣臣薛煥附片具

奏

克復青浦縣城摺

同治元年七月十八日

奏爲官軍攻克青浦縣城追殺逆眾大挫賊鋒恭摺馳陳仰祈

聖鑒事竊

臣

派兵進攻青浦業經

臣

於本月十三日專摺馳報在

案旋據在事文武稟報各路官軍先後薄青浦城下議定分門合

圍副將程學啟率開字三營由北簪山出隊進攻西北兩門副將

滕嗣武率林字兩營攻東門副將華爾率常勝軍會同參將李恆

嵩攻打南門十二日華爾以輪船駛進內河安放礮轟倒城垛

數處程學啟等各帶四成隊伍自東北兩門助之賊不敢接仗全

退入城當燬其北門外賊卡兩座東門外賊卡一座力攻六時之

久該逆堅伏不出遂各收隊十三日華爾復攻南門率勇爬城而

城上鎗礮甚密勇目被傷數十名又自松江添調常勝軍五百於

十五日子刻由南門進攻程學啟滕嗣武令開字等營各出八成

隊伍分攻東北兩門已革青浦縣知縣廖秩瑋代理知縣李克勤各率壯勇民團隨同進剿卯刻賊由北門出戰先經開字營擊敗東門之賊亦於巳刻出戰被林字營以劈山礮攔擊均復退回城中李鶴章帶舢板船四隻長龍船一隻堵扼東門河橋防賊東竄密飭參將劉士奇都司張樹珊主簿余思樞守備周盛波各帶隊在北門六里外埋伏通判韓正國參將郭松林都司苗順清各帶隊在西門六里外埋伏城賊如由兩路竄出則與程學啟等前後夾擊是日午刻華爾將南門城牆轟裂十餘丈急督勇冒煙撲上噴筒洋鎗並放城頭悍賊紛紛倒地我軍一擁而進賊眾拚死由西北兩門奪路而逃立將青浦縣城克復程學啟等揮兵截殺又經李鶴章所派兩路伏兵齊出追逐數十里直至白鶴口黃渡一帶十六日午刻始收隊回營其生擒逆匪四百餘名城申及沿途

殺斃溺斃者約計三四千名奪獲旗幟刀矛鎗礮無算此官軍攻克青浦追殺逆類大挫賊鋒之實在情形也伏查青浦切近松滬四月間經洋兵克復旋被大股賊匪攻陷踞守益堅此次臣調派各路官軍前往會剿仰賴

聖主威福華爾爭先效命諸將士奮勇圍攻遂能剋期報捷殲賊甚多實非臣始願所及自當遵

旨酌留官軍駐守署提黃翼升親帶礮船馳往布置暫令副將程學啟移師入城會同代理知縣李克勤妥籌保衛華爾同參將李恆嵩仍卽拔隊回松臣查副將華爾督軍鏖戰躬冒矢石奮勇登城可否仰乞

天語褒獎其餘尤爲出力文武員弁兵勇均屬著有微勞容臣查明彙入前次保案酌請獎勵所有攻克青浦縣城緣由謹繕摺由

驛六百里馳陳伏乞

皇上聖鑒訓示再據蘇松太道吳煦前蘇松糧道楊坊會稟接華爾知會派駐甯波之常勝軍於七月初八日會同各軍攻克餘姚縣城合併聲明謹

奏

李文忠公奏稿卷一